

Schnitzelbangg-Predigt am 8. Februar 2026 Breitenbach

**Sid dr parat für es Predigtwort mit Salz und Pfäffer?
E chli pikanter als gewöhnliche Pfaffä-Kläffer?**

Liebi Fasnächtlerinnen und Fasnächtler,
liebi verruckti, bunti Chilebsuecher *Inne

Jo, ihr merkets', s'foht jo scho guet a
mit all dene gendergerächte Wortchlaubereie,
si mir scho zmittst im Themefäld dinne

Mir wei ganz sicher niemer brüskiere oder geniere
du bisch genau so wie d'bisch, gliebt und muesch di nit ummodeliere!
Dass das Thema Schlagziele macht und vili bewegt,
e mänge im Chat kei Hemmige het,
loht mi mängmol chli rotlos dr Chopf lo schüttle
s'Verständnis und d'Grosszügigkeit chame schiints gärn chli durerrüttle,
s'gilt nid für jede und jedi s'gliche Gsetz,
wo passisch dri, pass uf, süscht zapplisch au du im Netz!
Meinigsfreiheit wird gross uf d'Fahne gschriebe
wenn alli si z'guet hei, denn git's do nüt z'reklamiere
s'Bhaupte und d'Wohrheit für sich ellai z'proklamiere
isch wohl s'grösch Übel, wo alli duet gegenang lo umebrüele
Doch eis muess i a dere Stell scho no zuegäh,
bimene Predigtwort, het's nu sälte e luutstarchs Widerwort gäh
Villicht – wer weiss – öp dir i Zuekunft euch do au s'Rächt drzue weit
näh?!

Reklamiere, debattiere, demonstriere, umekommandiere

Vermuetlich isch es immer e so gsi
und au i dr Zuekunft wird's nid anderscht si!
Und wenn is rächt überlegge due,
denn ghört's zu de menschliche Alage sicher drzue:
vo Chlii a wei mir eus doch riebe, spiegle am angere,
Gränze sueche, sich neu erfinge und nid nur chlammere
nur so wirsch Gross und chasch au d'Wält entdecke und entwickle,
verruckti Idee probiere: Bäum mit Wulle umwickle...

Guet ei Schlagwort hängt eim villicht scho chli zu de Ohre us:

Innovation!

Wirtschaftlichkeit – Nachhaltigkeit.

Alles neu macht der Mai! Dr gäge stoht:

Muesch s'Rad doch nid neu erfinde...

Früecher hesch zerscht es Problem gha und denn nach ere Lösig
gsuecht, hüt düemer uf Teufel komm raus,
transformiere, umstrukturiere, neu Arbeitsabläuf installiere,
Konzept i dr Schublade deponiere!

Jo, sone innovative Idee, die hät i jetzt au nu gärrn,
würd eso denn d'Chile in e nois Zietalter hieve
ganz ohni Widerständ vo Rom und witere Verhinderigsgremie, bitteschön
dr Heilig Geischt müesst do dr richtig CEO brieve

Em Bodepersonal göhnd d'Liechtli uf
S'Läbe bringe mir i die Heilige Hallä
Alli wei sich denn ibringe und froie sich druf
denn d'Botschaft isch klar und loht eim nid lo fallä.
S'Riich Gottes foht in Breitebach a,
am beschtä bi dir, öb Frau oder Maa.

Was hani versproche am Aafang vo däm Predigtwort?
Chli Salz muess id'Suppe,
damit's euch denn au e chli duet jucke
und sicher nid schal und langwilig wird und ihr nur eis weit:
schnäll schnäll wiit furt!
Und erscht no ganz analog und nid mit dr KI verboge –
keini Fakenews – alles ganz ungloge!
So wotti i mi jetzt au chli usem Fänster lehne
und mi bi Breitebacher Gschehnis bediene:

Orange isch's Logo
Mached dr mit?
Gemeinde bewegt
das isch jo dr Hit!
Vo Jung bis Alt
s'lot kei Verein chalt
me loht sich nid lumpe
und regt a, chli dure Wald z'gumpe
s'git nüd drgäge z lamentiere
Bewegig wird Gsundheit meischt garantiere
Olympia lockt eus mit grosse Verspräche
Medaille mit Fairness und Rekörd wei si bräche
grossi Shows und mir drücke dr Duume
wei länderverbindendi Momänt bestuune!

Doch hypered nid ellei im Sport hindedrii
Kultur verliert – das durt mi schwer – isch's wirkli verbii?
Mit Kunst in Bild und Ton,
mit Literatur und allerlei Kreation?
Musik als Sproch, wo alli verstöh,
keini Landessproche drzwüsche stöh.
Ohni Kultur – do göht dir alli sicher mit mir enig
wär d'Wält so arm und e Wüeshti – grau und steinig!
denn au d'Fasnacht zelebriert Kultur in höchstem Mass
d'Froid und d'Fantasie, sind s'Ventil vo däm bsungere Fass!
Froid am Läbe i belastende und agspannte Zyte
chli Farbefroh und ungeniert durch Basel ryte
am ESC oder a dr Fraue-EM i d Bsuechermängi itauche und sich nid lo
belehre
Made in switzerland Trällere, und für eimol dem Wältzirkus dr Rücke
chehre.
Keini Deals müesse ushandle,
die Bad-News für eimol is Gägeteil wandle
mit Frauenpower EM-Fieber
E Wälle, wo Muet uslöst und lieber
in Mänsche-förderndi Programm ine mündet
Inklusion – ganz ohni wenn und aber – dasch denn, wenn's zündet!
Keis FÜR, kei Chlöpf, wo 'd FÜRwehr muess usrück
das isch denn nüt me zum Entzücke,
wie do, wo s'Sunnefäld isch so schwer verschrocke
und d'Badi für dr Räscht vo dr Saison d'Tor het müesse abblocke.

2025 het brocht so mänge Schreck,
dr Bärg isch cho, es Dorf isch wäg!
Doch d'Solidarität isch gross –
es lot eus alli gar nit los.
Si zeigt sich jetzt, die Menschlichkeit
wo denn besteht, will d'Stimme im Härz eus «Zämme hebe» seit!

Do muess i doch nu anderi Aktione aführe
wo mi beidrücke und tief berühre
i dr Apotheke do näbedra, het's i dr Wiehnachtszyt e Baum gha stoh
wo Zettel Mänsche nöcher brocht het und das macht froh
Nochberschaftshilf, gemeinsam statt einsam, ässe, e Schwatz
Armut sichtbar mache – e Million Liechter erhelle dr EugenSanerplatz.

Dr Mänsch isch erfinderisch, loht dr ander nid im Stich
goht's um Grundlegends, denn verliert Oberflächlichs sini Bedütig, das
tröschtet hoffentlich.

Do passt denn einzig grad gar nid is Bild
dass dr Gmeindrot d'Jugendarbet und s Jugendhus drastisch ischränke
will!
Dr Träffpunkt für d'Jugend dä dörf nid verlore goh
es brucht näbscht de Vereine au zwäckfreii Rüm, das müend dr verstoh!

Wie d'Hirzefäger au das Johr die Stund wider zunere Happy hour het lo
wärde
das froit mi ganz bsunders und alli Beschwärde
dass d' Liechtstellwänd vo dr interaktive UnserVaterunser Usstellig
zittere,
d'Ohre düe dröhne, sogar nu uf em Heiwäg, däm bittere,

- Mir wei jo nid goh,
bsungers die Verchleidete alli do! –

die Beschwärde chönd dr im Liechtblick i d Läserspalte schriebe
S'Sekretariat wird Froid ha, denn chönne si's Schriebe sälber lo bliebe!

No es letschts:

Griessgrämer und Hingerwältler schrieb dr eis hingers Ohr:
gege Gfoor bruchsch mängmol au chli schwarze Humor!
So tönt's vo de Pfyfferli und so gseh's au i

Breitebacher gänd Gas und stüred druf hi
...i die drü schönste Däg vom Johr!
I wünsch vil Spass und vil Humor!

AMEN